

Boneiru

Lio Booi a alkansá 95 aña di edat

FLAMINGO DI BONEIRU A FAYESÉ

KRALENDIJK — Hubert (Lio) Booi a fayesé djasabra anochi djis promé ku 8'or. Ta un dje baluartenan kultural di Aruba. Boneiru semper a keda okupá un lugá importante den su kurason. Hopi bia nan tabata yam'é tambe 'Flamingo di Boneiru', refiriendo na su desendencia boneriano.

Lio a nase na Boneiru, bario Nikiboko, dia 25 di yuli 1919 i for di 1937 e ta biba na Aruba. For di dia ku el a pone pia riba suela di Aruba, el a demonstrá su apesio pa e isla aki ku su hendenan i su kultura. Prueba di esei ta su aporte grandi na e himno "Aruba dushi tera". E di tres

kuplèt ta su inspirashon: "Grandesa di bo pueblo ta su gran kordialidat. Ku Dios por guia i konservá su amor pa libertat." Lio Booi a traha e teksto original tambe di e himno di Boneiru 'Tera di solo'.

E kantikanan di mucha 'Oryunchi' (e piskadó) i 'Chanita' (di Buchi Wan) ta dos di e diferente komposishonnan di Lio Booi. E tabata bon amigu di Padú Lampe, ku a pone muzik pa e kantikanan aki.

Lio Booi tabata eskritor, poeta, kompositor, músiko, pintor. Na momentu ku el a yega Aruba el a bai traha

promé den sektor bankario di e isla ei, pa despues bai traha den turismo i kultura. E tabata hefe interino di Ofisina di Turismo di Aruba i di Servisio di Informashon di Gobièrnu. Mas despues, despues 1963, e tabata hefe di Departamentu di Kultura i Edukashon. Desde 1978 te na momentu ku el a baha ku penshun Lio Booi tabata direktor di Institutó di Cultura di Aruba.

Lio Booi tin diferente publikashon literario na su nòmber, entre otro "Golgotha" publiká na 1967 den "Antilliaanse Cahiers", "Muchila" publiká na 1969 i "E Flamingo di Aruba" publiká na 2006. I ken no ta kòrda e éksito grandi di su obranan musikal "E perla di Caribe" di 1955 i "Amor di Kibaima" di 1969.

Originalmente fraterman na Boneiru a prepará Lio Booi pa bira pastor. Na Aruba el a siña latin serka Pader Roghmans na parokia di Noord.







Hubert Booi tabata un promotor importante di e bida kultural di Aruba komoko-fundadó di Arubaanse Kunstkring i miembro di direktiva di Sociedad

Bolivariana. E tabata un konosedor outodidáktiko di idioma. Asta idioma ruso e tabata dominá.

Anke bibá na Aruba, Lio a keda semper ku amor pa su isla natal Boneiru. El a traha e teksto original pa e aktual himno di Boneiru. Gobièrnu di Boneiru a nombra komo siudadano di honor. Riba e wèpsait www.bonaire.tv tin por lo ménos dos entrevista di un ora ku Lio Booi.


Fotonan huntu ku e artíkulo aki ta pa kortesía di Farah-Mia Everon i Famous

Diaz.



ALL DENTURE LAB

Tandprothetische Praktijk
Bonaire N.V.
Kaya Dr. J.G.Hernandez s/n
(banda di Botika Korona)



AKI TA TRAHA I DRECHA PLANCHA PA DJIENTE.
BO TA WARDÁ MIENTRAS NAN TA DRECHE, SERVISIO
RAPIDO.

Habri di djaluna pa djaweps di 9'or mainta pa 12'or /
2'or pa 4'or di atardi i djabierne di 9'or mainta pa 12'or
merdia atardi ta SERA.

Por yama pa un sita na tel. 717-2248 òf selular 786-3714
E.M. Rijswijk.